

Bengkel Pembangunan & Pemantapan MODAL INSAN 2009

Falino Md. Fadzil & Shanuriza Othman



Langkawi - 23 hingga 26 Disember 2009, Jabatan Hal Ehwal Pelajar & Alumni (JHEPA) telah menganjurkan Bengkel Pembangunan & Pemantapan Modal Insan 2009 bertempat di Kem PLKN Beringin, Pulau Langkawi. Bengkel ini disertai oleh Majlis Perwakilan Pelajar serta pemimpin-pemimpin kelab dan persatuan pelajar UniMAP. Bengkel ini merupakan kesinambungan usaha Jabatan HEPA untuk melahirkan pemimpin yang cemerlang dalam bidang akademik, pembinaan sahsiah dan mempunyai sifat kepimpinan yang unggul.

Antara pengisian bengkel ini meliputi pendedahan berkenaan asas kemahiran pengurusan dan teknik-teknik kepimpinan, slot penerangan AUKU 1971 (Pindaan 2009) & Tata tertib Pelajar, tatacara dan protokol penganjuran serta pengacaraan sesuatu majlis, kemahiran komunikasi & pengucapan awam, prosedur penyediaan kertas kerja, prosedur kewangan dan penajaan. Dekan

Jabatan HEPA, Encik Razli Ahmad turut menyumbang pandangan dan berkongsi pengalaman bersama peserta bengkel dalam menyampaikan ceramah yang menyentuh soal bagaimana untuk membentuk sifat dan tindakan sebagai seseorang pemimpin yang berjaya dan cemerlang.

Pada hari kedua, para peserta diminta membuat tugas dalam kumpulan menerusi aktiviti lasak teambuilding. Aktiviti lasak teambuilding diadakan bertujuan untuk menguji dan meningkatkan daya tahan para pemimpin pelajar bagi menghadapi situasi semasa, meningkatkan semangat kerja berpasukan dan merapatkan silaturahim sesama peserta bengkel. Mereka diberi taklimat oleh jurulatih kem tersebut mengenai cara-cara membuat rakit dan cara pemakaian jaket keselamatan dengan betul. Setelah selesai taklimat, para peserta diberi tayar dalam, batang paip dan tali untuk membuat sebuah rakit bagi setiap

kumpulan. Selesai menyiapkan rakit, mereka diarah masuk ke dalam air laut untuk menguji keyakinan peserta di dalam air (water confident). Pada jam 2.00 petang, peserta memulakan perakitan mereka mengikut kumpulan masing-masing. Selain itu, peserta turut diuji dari segi ketahanan mental dan fizikal melalui aktiviti flying fox dan abseiling.

Melalui bengkel ini, adalah diharapkan agar semua peserta yang terdiri dari pemimpin mahasiswa dapat melahirkan kesatuan buah fikiran dan tindakan bagi mewujudkan kepimpinan mahasiswa yang ideal, proaktif dan efektif serta mampu bekerjasama dengan semua pihak sebagai satu pasukan yang dinamik. Majlis penutup dirasmikan oleh Cik Aizatul Akma Wani Binti Ariffin, Pegawai Tadbir Unit Aktiviti & Antarabangsa yang mewakili Dekan JHEPA.

